

KANTON SARAJEVO

SKUPŠTINA KANTONA SARAJEVO

Elza Gaković – Samostalna zastupnica

Arijana Memić – Samostalna zastupnica

Jelena Pekić – Klub SDP BIH

Za:

Vlada Kantona Sarajevo

Ministarstvo zdravstva Kantona Sarajevo

Zastupnička inicijativa:

Da se udruženje za promociju i unapređenje zdravlja “Generacija” proglasi udruženjem od posebnog interesa za Kanton Sarajevo.

Obrazloženje:

Udruženje za promociju i unapređenje zdravlja „Generacija“ prvo je udruženje koje je ponudilo cjelovito rješenje za osobe treće životne dobi kroz različite zdravstvene, edukativne i socijalne programe u skladu sa standardima i preporukama Svjetske zdravstvene organizacije (WHO).

Koncept rada prvog centra zdravstvenog karaktera za osobe treće životne dobi u Bosni i Hercegovini opravdao je svoju misiju — što potvrđuje i zahvalnica koju je Općina Stari Grad 2017. godine dobila od strane UNFPA za otvaranje prvog centra za brigu o osobama treće životne dobi.

Rad UNFPA-e na aktivnostima unaprijeđenja zdravlja starih osoba u BiH se bazira na zaključcima Međunarodne konferencije o populaciji i razvoju i Madridskog plana akcije za stare iz 2002. godine, koji su usmjereni na unaprjeđenja zdravlja i blagostanja u starosti te osiguravanje i omogućavanje okruženja koje će pružati podršku starim ljudima.

Od 2018. -2020. godine uz podršku Općine Stari Grad i projekte finansirane od strane UNDP-a nakon implementiranih projekata u okviru ReLOAD programa s fokusom na unapređenje zdravlja predškolske, školske, radno aktivne i starije populacije, Udruženje je dobilo potvrdu za najtransparentniji rad i najbolje postignute rezultate sa osobama treće životne dobi, gdje je također prepoznato kao primjer dobre prakse.

Općinsko vijeće je 2023. godine dodijelilo Udruženju zahvalnicu za doprinos u promovisanju i razvoju Općine, dok je nakon sedmogodišnjeg rada 2024. godine proglašeno Udruženjem od posebnog značaja za Općinu Stari Grad.

Značaj i uspjeh rada našeg Udruženja prepoznat je i od strane Kantona Sarajevo, čija je Skupština na sjednici održanoj 17.04.2025. godine verificovala Odluku odbora za dodjelu javnog priznanja – Plakete Kantona Sarajevo Udruženju „Generacija“ (br. 01-04.12774/25) za izuzetan doprinos unapređenju zdravog i aktivnog života starijih osoba kroz njihovo uključivanje u sve društvene tokove, jačanje socijalizacije, resocijalizacije i međugeneracijske inkluzije.

Western Norway University of Applied Sciences, Bergen, Norveška je kroz rad na projektu Globalne perspektive o zdravom starenju potvrdilo pozitivan uticaj na zdravlje i kvalitet aktivnog života osoba treće životne dobi kroz aktivnosti Centra „Generacija“.

Centar „Generacija“ djeluje na temeljima višegodišnjeg iskustva u oblasti javnog zdravstva, edukacije, promocije zdravlja i implementacije projekata sa domaćim i međunarodnim partnerima, među kojima su UNICEF, UNFPA, TIKA, Federalno ministarstvo zdravstva, Federalni zavod za javno zdravstvo, Ministarstvo za rad, socijalnu politiku, raseljena lica i izbjeglice Kantona Sarajevo, Ministarstvo zdravlja Kantona Sarajevo itd.

Kroz osmogodišnji rad, Centar je uključen kao naučna baza za odvijanje praktične nastave i naučno-istraživački rad studenata Fakulteta zdravstvenih studija Univerziteta u Sarajevu, pri čemu se daje doprinos edukaciji studenata i njihovom usvajanju dobre prakse koja uveliko doprinosi zdravlju i kvaliteti života osoba treće životne dobi, kao i drugih populacionih skupina.

Misija je promocija, unapređenje i popularizacija zdravlja i aktivnog načina života među osobama treće životne dobi, djecom, mladima i ostalim slojevima društva.

Cilj rada Centra jeste kontinuirano unapređenje zdravlja i kvalitete života starijih osoba, njihovo aktivno uključivanje u zajednicu, međugeneracijska inkluzija, prevencija prijevremenog institucionalnog smještaja, te jačanje partnerstva s porodicama, zdravstvenim i socijalnim radnicima. Na taj način se doprinosi stvaranju mreže podrške koja omogućava starijim osobama dostojanstven, zdrav i aktivan život u zajednici.

Tokom pandemije COVID-19, Udruženje je pokazalo izuzetnu spremnost i odgovornost u zaštiti zdravlja građana, posebno osoba treće životne dobi, kroz organizaciju zdravstvenih savjetovališta, emitovanje vježbi za unapređenje fizičke kondicije i promociju prevencije bolesti lokomotornog sistema putem medija širom BiH.

Multidisciplinarni program promocije zdravog i aktivnog starenja, koji obuhvata medicinsko savjetovanje, fizikalnu terapiju, terapijsko vježbanje, okupacionu terapiju, zdravstvena predavanja te socijalizacijske i resocijalizacijske aktivnosti, pokazao se kao izuzetno efikasan i koristan model podrške starijoj populaciji.

Kroz osam godina kontinuiranog rada, Udruženje „Generacija“ je izgradilo prepoznatljiv identitet i povjerenje zajednice, doprinoseći stvaranju kvalitetne prakse u radu sa svim populacionim skupinama - poštujući principe inkluzivnosti, ravnopravnosti spolova, multikulturalnosti i multietičnosti.

Tome svakako svjedoči i posjećenost i članstvo osoba treće životne dobi i ostalih populacionih skupina iz cijelog Kantona Sarajevo. S obzirom na to da je Udruženje implementiralo veliki broj projekata na području različitih općina, uključujući Općinu Stari Grad, Općinu Centar, Općinu Novo Sarajevo i Općinu Novi Grad, do sada je obuhvaćeno više od 5.000 korisnika. O uspješnosti realizacije i broju korisnika svjedoče i brojni narativni izvještaji o provedenim projektima.

Tokom posljednje tri godine rada, Udruženje je fokusirano na razvoj kantonalnog centra u Općini Stari Grad, koji svakodnevno pruža podršku za oko 300 korisnika.

Centar ostvaruje značajan uticaj kako na direktne, tako i na indirektne korisnike.

Direktni korisnici (300 osoba) su redovni članovi Centra koji aktivno učestvuju u različitim programima i aktivnostima, poput terapijskih vježbi, individualnog unapređenja zdravlja, medicinskog savjetovanja, te okupacionih radionica kao što su slikanje, pletenje, vezenje, kursevi engleskog jezika i informatike, te sekcije književnosti, poezije i proze. Uz to, učestvuju i u radionicama porodičnog savjetovanja i zdravstvenim izletima.

Indirektni korisnici (oko 1.005 osoba) su oni koji Centar posjećuju povremeno — jednom sedmično, jednom u 15 dana ili jednom mjesečno — te oni koji putem naših elektronskih sadržaja, poput emitovanja na TVSA programu i objava na društvenim mrežama, ostvaruju koristi i ciljni efekat u oblasti promocije i unapređenja zdravlja.

S obzirom na navedene rezultate i značaj djelovanja, smatramo da Udruženje „Generacija“ zaslužuje da bude prepoznato kao udruženje od posebnog značaja, jer: okuplja veliki broj građana u cilju promocije i unapređenja zdravlja, postiže značajne rezultate u unapređenju kvaliteta života i zdravstvenog statusa, te uključuje različite populacione skupine u društveni i kulturni život, organizuje javne događaje i nastupe koji afirmišu urbani identitet, toleranciju i razvoj demokratskog društva, realizuje programe od velikog interesa za građane svih dobnih i socijalnih kategorija.

Kontinuiranim ostvarenjem programskih ciljeva, Udruženje „Generacija“ doprinosi stalnom povećanju osoba, koje su zahvaljujući multidisciplinarnom djelovanju postale aktivniji, zdraviji i društveno uključeni članovi zajednice.

Dobivanjem statusa udruženja od posebnog značaja, Centar bi mogao dodatno proširiti djelovanje, unaprijediti postojeće programe i uspostaviti Edukativni centar za obuku novih stručnjaka u radu sa osobama treće životne dobi.

Na taj način bi se osigurao kontinuitet kvalitetne i multidisciplinarne prakse, koja će služiti kao model budućim generacijama stručnjaka u oblasti javnog zdravlja, socijalne zaštite i gerontologije.

Sarajevo, 31.11.2025.godine

Zastupnice u Skupštini KS

Elza Gaković

Arijana Memić

Jelena Pekić